

viiij

cum quo sese in Urbe reciperent , annuosque redditus constituit . Monasterium ⁽¹⁾ enim S. Stephano Protomartyri nuncupatum , juxta absidem Sacrosanctæ Basilicæ Vaticanæ situm , a Sancto Leone Magno olim fundatum , deinde a Clemente XI. magnifice instauratum , Monachis Coptis & Abissinis Ordinis S. Antonii , ea lege concessit , ut ibidem non patrium modo Alexandrinæ Ecclesiæ Ritus in Liturgia & in Divinis Officiis , necnon Monasticum vivendi genus , quod in Monasteriis per Ægyptum , atque Æthiopiam olim apud Orthodoxos obtinebat , diligenter excolerent ; verum etiam ut sacrarum literarum studiis vacarent , quarum subsidiis instructi , Catholicæ Religionis propagandæ in vastis illis Regionibus aptiores redderentur . Jussit insuper , aliquot ejusdem gentis pueros in Collegium pro Fide propaganda constitutum evocari , ubi salubribus disciplinis , moribusque informati , pietatis , ac doctrinæ

(1) Clementis XII. Literæ Apostolicæ, die 15. Jan. 1731. expeditæ. In initium. Alias, postquam rec. mem. Clemens PP. XI. prædecessor noster. Ibi: Eisdem Monachos natione Abissinos seu Æthiopes, & Coptos sive Ægyptios, ad possessionem ejusdem Ecclesiæ domorumque, illi contiguarum, necnon horti & viridarii, aliorumque annexorum &c. Dat. Romæ &c. die 15. Jan. 1731. Pontificatus anno primo.